

HARI : AHAD
TARIKH : 8/9/2019
M/SURAT : 62

Pengguna disaran utama barang buatan Malaysia

Butterworth: Pengguna disaran mengutamakan barang buatan Malaysia berbanding hanya membeli produk pihak tertentu.

Menyatakan hal ini, Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail, berkata tindakan segelintir pihak memboikot barang buatan Bumiputera dan bertukar kepada mengutamakan produk Muslim, adalah dalam tujuan sama.

"Mereka ini berubah-ubah, bermula sebagai boikot. Selepas diberi jawapan rasional kenapa tak perlu ada boikot, skripnya itu diubah kepada mengutamakan produk Muslim.

"Fokus kita ialah untuk memperoleh kehidupan harmoni dan memakmurkan negara, maka kita perlu dukungan semua pihak.

"Dalam konteks negara ini, apa yang patut kita dahulukan adalah kempen beli barang buatan Malaysia," katanya pada sidang media selepas merasmikan Rumah Ilmu Dewan Undangan Negeri (DUN) Teluk Air Tawar di sini, semalam.

Minggu lalu, Perdana Menteri, Tun Dr Mahathir Mohamad dilaporkan berkata, tindakan memboikot barang buatan Bumiputera tidak sepatutnya berlaku dan tidak akan memberi kesan, sebaliknya hanya membulatkan kemarahan.

Kenyataan itu susulan gerakan beberapa pertubuhan bukan kerajaan (NGO) melancarkan kempen mengutamakan pembelian produk Islam, di samping menggesa masyarakat Melayu memboikot barang serta perkhidmatan bukan Islam.

Sementara itu, Saifuddin berkata, kertas kerja membabitkan pelaksanaan subsidi petrol berdasar menunggu giliran untuk dibentangkan di Kabinet.

"Kertas kerja sudah siap sepenuhnya dan akan dibentangkan dalam mesyuarat Kabinet pada masa terdekat," katanya.

Di Alor Setar, cadangan memboikot barang buatan bukan Bumiputera disifatkan tidak wajar kerana hanya akan mengundang perpecahan dalam kalangan masyarakat.

Menteri Kewangan, Lim Guan Eng, berkata tindakan golongan cetek pemikiran itu mampu meretakan hubungan masyarakat berbilang kaum.

"Mana-mana pihak seharusnya tidak menganjurkan program yang boleh memecah-belah masyarakat, sebaliknya semua harus bersatu-padu supaya Malaysia menjadi negara berjaya," katanya ketika berucap sempena perasmian Pesta Kebudayaan Cina Malaysia Ke-36 di sini, semalam.